



АКАФИСТ  
чудотворной иконе  
Божией Матери  
ФЕОДОРОВСКОЙ



### КОНДАК 1

М 10657442, 2

**В**збранной Воеводе, Пренепорочней Деве Богородице, Заступнице нашей и предстательству христиан непостыдному, явлением чудных иконы Своея радование подавшей земле Российстей и вся верныя чада Церкви просветившей, благодарение усердно приносим Ти, Богородице, и припадающе пречудному образу Твоему умильно глаголем: спаси, Госпоже, и помилуй рабы Твоя зовущия: Радуйся, Мати Божия, Предстательнице и Заступнице наша усердная.

### ИКОС 1

**А**нгел Гавриил от Бога послан бысть во град Назарет ко Пречистой Деве Марии, и вшед к Ней рече: радуйся Благодатная, Господь с Тобою, благословена Ты в женах. Ангельскому гласу подражающе, и мы грешнии, радости и благодарения в сердце своем исполнени, пред явленным образом Твоим благохваления наша возносити к Тебе дерзаем, Пресвятая Богородице: Радуйся, отрасли от корене

Давидова Благословенная: радуйся, обетом родителей в жертву Богу принесенная. Радуйся, святых праведных Иоакима и Анны дщи Богоданная: радуйся, триех лет во храм Божий введенная и тамо воспитанная: Радуйся, тамо смирением и чистотою всех удивившая: радуйся, тамо Ангельския беседы сподобльшаяся. Радуйся, Дево, о зачатии Бога Слова благовестие во смирении приемшая: радуйся, избранная Отроковице, к зачатию Бога Слова силою свыше осененная. Радуйся, тайну воплощения Сына Божия, от веков в Бозе сокровенную, открывшая: радуйся, Агнице, рождшая Агнца Христа, взявшего грехи мира. Радуйся, Тобою бо избавляемся мук адовых: радуйся, Тобою бо сподобляемся вечная жизни. Радуйся, Мати Божия, Предстательнице и Заступнице наша усердная.

## КОНДАК 2

**В**идя икону Твою, Пресвятая Дево, на древе стоящу, князь благочестивый Костромский ужасом многим содрогашеся недоумя что бысть видение сие; хотящу же ему прияти ю и от сего свыше удержану ему бывшу, не можаше: уведев, яко чудно есть, иконы тоя явление, воззва к Богу: Аллилуиа.

## ИКОС 2

**Р**азумом желая разумети князь благочестивый пришествие пречуднаго Твоего образа во град Кострому, Богородице, душею радования преисполненною, себе предаде водительству Божию, и

преклонь колена, со страхом вопияше Тебе: радуйся, Дево, явльшая образ Свой чудно: радуйся, Благословенная, в явлении образа Своего милосердие нам являющая. Радуйся, о всех чтущих Сына Твоего промышляющая: радуйся, всем просящим у Тебе дары, в меру веры, ко спасению подающая. Радуйся, путь истины заблуждшим показующая: радуйся, к горнему миру чудесы Твоими ум наш возводящая. Радуйся, смущения помышлений сумнительных удаляющая: радуйся, славящих Тя всегда прославляющая. Радуйся, чистотою Твоею чистоте нас научающая: радуйся, чистотою Твоею нечистоту нашу обличающая. Радуйся, моления наша приемлющая: радуйся, рыданий и слез неотметающая. Радуйся, Мати Божия, Предстательнице и Заступнице наша усердная:

### КОНДАК 3

**С**илу Божию благочестивый князь познав в восхождении образа чуднаго Твоего, Богомати, в явлении же видев милосердие Твое ко всем спасение хотящим получитьи, рече: Аллилуиа.

### ИКОС 3

**И**мев помысл стяжати даруемое Небесное сокровище, лик Твой светлый, Богомати, второе простре державный руку к образу низшедшему: узрев же паки его восхождение, скоро поиде во град и поведа о бывших ему освященному собору, да пришедше в видяще иконы Твоея явление возопиют с ним вернии: Радуйся, Царице небеси и земли: радуй-

ся, Престоле Царя царствующих. Радуйся, Пренепорочная Дево: радуйся, Мати Непреступнаго Света. Радуйся, Честнейшая Херувим: радуйся, Славнейшая без сравнения Серафим. Радуйся, небесными Силами величаемая: радуйся от всех земнородных ублажаемая. Радуйся, неизреченное веселие Ангелов: радуйся, Венче царственный всех Пророков и Апостолов. Радуйся, православия Христовы Церкви ограждение: радуйся, всех суемудрых учений и ересей низложение. Радуйся, Мати Божия, Предстательнице и Заступнице наша усердная.

#### КОНДАК 4

**Б** урю внутрь имея помышлений недоуменных, освященный собор со псалмы и песньми духовными абие притече видети Образ Твой, Неискусобрачная. Узрев же его на древе дивно стояща и благолепно красотою сияюща, рече: Аллилуиа.

#### ИКОС 4

**С** лышаша людие честныя иконы Твоея, Богоотроковице, пришествие, и ко оной текше поклоняхуся, аки Самей Тебе сущей, и с умилением и слезами вопияху к Тебе: Радуйся, Дево, Благословенная в женах, во чреве Твоем Носителя всяческих носившая: радуйся, рождением Сына Твоего спасение миру всему явльшая. Радуйся, человеки с Богом соединившая: радуйся, Превышшая небес, избавльшая нас от клятвы. Радуйся, нас к вечней жизни руководящая: радуйся, Владычице мира. Радуйся,

Божие к смертным благоволение: радуйся, смертных к Богу дерзновение. Радуйся, благих во благости соблюдающая: радуйся, лукавых на путь благий обращающая. Радуйся, под сень крова Твоего прибегающих милующая: радуйся, уповающим на Тя вся потребная к животу и благочестию дарующая. Радуйся, Мати Божия, Предстательнице и Заступнице наша усердная.

### КОНДАК 5

**Я**ко Боготечную звезду узреша людие икону Твою, Безвестная Дево, и яко многосветлый светильник поставиша ю во святем соборнем храме, радующеся и вопиюще Богу: Аллилуиа.

### ИКОС 5

**В**идевше жителие града Городца Образ Твой, Владычице, во храме града Костромы стоящий, и на руку Твоею держима Богомладенца Иисуса, скорбию одержими беша: зане отшествие Его бысть из града их. Мы же, обрадовани благоволением Твоим ко граду нашему, приносим Ти дары, и с любовью лобызающе Твой святой Образ вопием Ти: Радуйся звездо, Солнце Правды нам явльшая: радуйся, возлюбившая сию страну. Радуйся, обретение Тебе ищущих: радуйся, радостию неизреченною верных сердца исполняющая. Радуйся, Сокровище благодати неистощимое: радуйся, милости приснотекущий Источниче. Радуйся, от тяжких бед спасающая: радуйся, от смертоносных язв избавляющая. Радуй-

ся, всего мира Ходатаице: радуйся, всех недугов Целительнице. Радуйся, красото несравненная: радуйся, доброто несказанная. Радуйся, Мати Божия, Предстательнице и Заступнице наша усердная.

### КОНДАК 6

**П**роповедницы Богоноснии быша видевшии образ Твой, Богородице, возвращая бо кийждо во страну свою, возвещаше о пришествии Его и чудесех от Него бываемых, воспевая Богу: Аллилуиа.

### ИКОС 6

**В**озсиявша благодать от чуднаго Образа Твоего, Чистая, веру немощствующих утверди, верных же возвесели сердца любовью. Сего ради радуешься вопием Ти: Радуйся, Пресвятая Дево, светом Небесная истины нас озаряющая: радуйся, мглу греховную от нас отгоняющая. Радуйся, чудеса Твоими к Боговедению нас приводящая: радуйся, всех кающихся грешник ко благочестию подвизающая. Радуйся, всех притекающих к Тебе крепкое заступление: радуйся, немощствующих умом утверждение. Радуйся, изнемогающих в вере возставляющая: радуйся, тихое пристанище в море житейстем обуруваемым. Радуйся, злыя советы сынов погибельных открывающая: радуйся, вознесенную гордыню врагов отечества нашего смиряющая. Радуйся, православных царей державо: радуйся, всех Христиан похвало: Радуйся, Мати Божия, Предстательнице и Заступнице наша усердная.

## КОНДАК 7

**Х**отя прославити Сын Твой, Богородице, святую икону Твою во граде Костроме, повеле ю в день Успения Твоего святому великомученику Феодору Стратилату носить по граду сему, да вси видяще чудо сие благодарным сердцем возопиют Ему: Аллилуиа.

## ИКОС 7

**Ч**удо новое яви нам Господь мольбами Твоими, Богородице, егда сгоревшу храму, в немже бе поставлен святой образ Твой, сохрани его в пепле невредима от огня, и тако мневших сгоревша его печаль в радость преложи. Мы же чудо сие ведяще, воспеваем Ти таковая: Радуйся, купино неопалимая: радуйся, Огненный столпе, сущия во тьме наставляяй. Радуйся животе, Духом позлащенный, Невместимаго Бога вместивший: радуйся, кадильнице золотая, яко фимиам благоуханный, молитвы Твоя за ны к Богу Сыну присно возносящая. Радуйся, жезле Ааронов к явлению в мир Сына Твоего прозябший: радуйся, руно Гедеоново, благодатию Божиею во спасение наше орошенное. Радуйся, горо несекомая, от неяже отсечеса краеугольный камень Христос: радуйся, Храме одушевленный, в немже вселися Божество телесне. Радуйся, девства охранение: радуйся, супружества благословение. Радуйся, паче всех Господа возлюбившая: радуйся, паче всех от Него превознесенная. Радуйся, Мати Божия, Предстательнице и Заступнице наша усердная.



## КОНДАК 8

**С**транное чудо видевше, на воздухе икону Богоматери стоящу, аки руками Ангельскими держиму, егда второе сторе храм, в немже стояше явленная сия икона, отвержемся, людие, мира сего, ум на небеса преложше: сего бо ради и дадесе нам чудная икона Богородицы, да взирающе на ню горняя мудствуем, а не земная, вопиюще к Богу: Аллилуиа.

## ИКОС 8

**В**ышних пребывающи селениих, и нижних не разлучилася еси Богородице, чудесы Твоими всех просвещающи приходящих к Тебе верою: сего ради и слышиши от нас сия: Радуйся, Мати Христа Бога нашего, на небеси пребывающая: радуйся, на земли нас не оставляющая. Радуйся, ради величества Твоего на небеси Ангелы окруженная: радуйся, ради славы Твоя на земли от человек прославляемая. Радуйся, Тебе бо служат вся небесныя Силы: радуйся, Тебе бо, по Бозе, хваление возносят Херувими и Серафими. Радуйся, лице Божие выну на небеси созерцающая: радуйся, пред Престолом Сына Твоего Матерния руце Твои за ны молящися простирающая. Радуйся, нас сущих на земли от всякаго зла омофором Твоим покрывающая: радуйся, верных от всяких душепагубных дел удаляющая. Радуйся, рождением Сына Божия двери Царства Христова нам отверзшая: радуйся, надеждою приятия небесных благ верных души улаждающая. Радуйся, Ма-

ти Божия, Предстательнице и Заступнице наша усердная.

### КОНДАК 9

**В**сякое естество Ангельское превозносит Тя, Дево, великия ради любви Твоея к роду Христианскому: незрима бо и неприступна, яко Мати Бога от земли к небеси возшедшая, Пречистым Твоим образом зриму и приступну Себе являеши всем воспевающим Сыну Твоему: Аллилуиа.

### ИКОС 9

**В**етия многовещанья, яко рыбы безгласны зрим о Тебе, Богородице: недоумеют бо глаголати о славных чудесех, от явленных Твоея иконы бываемых. Мы же онем дивящися благодарно вопием Ти: Радуйся, слепых прозрение: радуйся, хромых хождение. Радуйся, от темных и лукавых духов исцеляющая: радуйся, лучами от Твоего Пречистаго образа изшедшими врагов земли нашае отгнавшая. Радуйся, больным видение Твое даровавшая: радуйся, молящимся явленной иконе Твоей исцеление подающая. Радуйся, расслабленных от одра болезни воздвигающая: радуйся, немым разрешающая уста. Радуйся, от плена вражия возвращающая: радуйся, лютыя плоти страсти утоляющая. Радуйся, души верных неизреченным милосердием Твоим умиляющая: радуйся, неизглаголаным Твоим человеколюбием унывающих ободряющая. Радуйся, Мати Божия, Предстательнице и Заступнице наша усердная.

## КОНДАК 10

**С**облюсти хотящи в чистоте домостроительство Церкви православныя, Чистая, и утвердiti скипетр державы Россiйскiя, чудною иконою Твоею вложила еси в сердце благовернаго Государя Михаила Феодоровича прияти венец Царскiй земли Россiйскiя, да вси видящи видят, яко Вышнiй владеет царством и емуже хочет дает е, и возопиют Ему: Аллилуиа.

## ИКОС 10

**С**тена еси неоторимая, Богородице Дево, всем к Тебе прибегающим: никтоже бо притекаяй к Тебе тощ отходит. Сего ради ущедрями милостию Твоею, во умилении души возглашаем Тебе: Радуйся, твердая стено, от враг видимых и невидимых охраняющая: радуйся, крепкая защито упование на Тя возложившим. Радуйся, познания истины чистое зеркало: радуйся, сохранения веры крепкое забрало. Радуйся, грады и страны христианския предствительством Твоим от врагов спасающая: радуйся, царем благоверным поборающая. Радуйся, мир во градах селящая: радуйся, благонравным благопоспешающая. Радуйся, силою молитв Твоих злыя помыслы в ничтоже обращающая: радуйся, силы врагов ближняго сокрушающая. Радуйся, юности наставление: радуйся, старости поддержание. Радуйся, Мати Божия, Предствительнице и Заступнице наша усердная.

## КОНДАК 11

**П**ение всякое побеждается спростретися тща-  
щеся множеству многих щедрот Твоих:  
равночисленные бо песку морскому песни аще приносим  
Тебе, Богородице Дево, ничтоже совершаем достойно,  
яже даровала еси нам вопиющим к Богу: Аллилуиа.

## ИКОС 11

**С**ветопримную свещу, древле явльшуюся, зрим  
во Святей иконе Твоей, Богородице Дево,  
егда град наш защитила еси от разорения врагов  
земли нашей лучами от Святыя Твоея иконы исходящими.  
Сего ради с верою припадающе к ней и с любовию  
лобызающе ю вопием Ти: Радуйся Мати, Превечнаго  
Света Христа, учением Его души просвещающая:  
радуйся, благодатию Божиею неверующих к вере в Бога  
приводящая. Радуйся, путешествующим спутешествующая:  
радуйся, нужно плавающих кормчая. Радуйся, от всякия  
скорби, гнева и нужды спасающая: радуйся, от глада,  
губительства, труса и огня сохраняющая. Радуйся,  
избавляющая от иноплемennных: радуйся, охраняющая  
от междоусобна брани. Радуйся, в Святей иконе Твоей  
яко солнце в Костромских пределех возсиявшая:  
радуйся, zde отрасль царственную возвеличившая.  
Радуйся, Тобою бо утверждаются царства: радуйся,  
Тобою бо венчаются цари. Радуйся, Мати Божия,  
Предстательнице и Заступнице наша усердная.

## КОНДАК 12

**Б**лагодать приявшая от Бога Сына Твоего, Дево Богородице, и ту древле изливавшая на всех прибегающих к образу Твоему, не лиши ныне и нас богатия Твоея милости, даруй нам покаяние о гресех, да чистым сердцем и устыны взываем к Возлюбленному Сыну Твоему и Богу нашему: Аллилуиа.

## ИКОС 12

**П**оюще Твоя милости и чудеса, хвалим Тя вси, Богородице, и яко древлий Израиль, к кивоту завета притекаем ко Образу лица Твоего, и из глубины души вопием: воздвигни руке Твоя к Сыну Твоему, да подаст нам вся благая и спасительная с верою и любовию вопиющим Ти: Радуйся, утешение наше в скорбех: радуйся, утоление печалей наших. Радуйся, радости наша безконечная: радуйся, светлосте и отрадо сердечная. Радуйся, надеждо наша крепкая: радуйся, сирым приятилище. Радуйся, странным прибежище: радуйся, обидимым Покровительнице. Радуйся, оклеветаемых оправдание: радуйся, благих защищение. Радуйся, тела моего врачевание: радуйся, души моя спасение. Радуйся, Мати Божия, Предстательнице и Заступнице наша усердная.

## КОНДАК 13

**О**премилосердая Заступнице наша, великия ради милости Твоея даровавшая отечеству и граду нашему чудотворную икону Твою во освяще-

ние, утешение и ограждение наше. Нынешнее приемши славословие, от всякаго злаго обстояния избави рабы Твоя. Скипетр Благовернаго императора нашего утверди, даруй ему здравие и спасение, на враги победу и одоление, и всех нас вечных мук свободи, устнами, душею же и сердцем вопиющих: Аллилуиа.

*Сей кондак глаголи трижды. Также икос 1-й: «Ангел предстатель» и кондак 1-й: «Взбранной Воеводе».*



### МОЛИТВА 1-я

**О** Пресвятая Владычице Богородице и Приснодево Марие, единая надеждо нам грешным, к Тебе прибегаем и Тебе молим, яко велие имаши дерзновение пред Рождшимся от Тебе по плоти Господом Богом и Спасителем нашим Иисусом Христом. Не презри слез наших, не возгнушайся воздыханий наших, не отрини скорби нашея, не посрами упования нашего на Тя, но Матерними молении Твоими умоли Господа Бога, да сподобит нас грешных и недостойных свободитися от грехов и страстей душевных и телесных, умрети миру и жити Ему Единому по вся дни живота нашего. О Пресвятая Владычице Богородице, путешествующим спутешествуй и ограждай и охраняй оныя, избави плененных от пленения, свободи страждущих от бед, утеши сущих в печали, скорбех и напастех, облегчи нищету и всяко злостра-

дание телесное, и даруй всем вся потребная к животу, благочестию и жизни временней. Благочестивейшаго Государя императора укрепи и утверди и подаждь ему здравие и спасение и на враги победу и одоление. Спаси, Владычице, вся страны и грады и сию страну и сей град, имже сия и чудотворная и Святая икона Твоя дадесе во утешение и ограждение, избави я от глада, губительства, труса, потопа, огня, меча, нашествия иноплемнных, междоусобных брани, и отврати всякий гнев на ны праведно движимый. Даруй нам время на покаяние и обращение, избави нас от внезапных смерти, и во время исхода нашего предстани нам явльшися, Дево Богородице, и избави нас от воздушных мытарств, князей века сего, сподоби на страшнем судищи Христовом стати одесную, и соделай нас снаследники вечных благ, да славим во веки великолепое имя Сына Твоего и Бога нашего со Безначальным Его Отцем и Святым Благим и Животворящим Его Духом, ныне и присно и во веки веков. Аминь.

### МОЛИТВА 2-я

**О** Премилосердая Госпоже, Царице, Богородице, прими смиренное моление наше, и не отри ни нас, заступление и прибежище наше, и не возгнущайся нас недостойных, но яко Милосердая, не престани молящи, Егоже родила еси, да дарует нам прощение многих согрешений наших, да спасет нас имже весть судьбами. Помилуй нас Владычице, помилуй нас, несть бо нам спасение от дел. Темже верно

вопием Ти: помилуй рабы Твоя, и неплодное сердце наше покажи плодоносно благих дел. Призри на нас недостойных. Ты бо упование и покров наш, жизнь и свет сердцу нашему. Яко Невечерний Свет от чрева Твоего воздвигшая, озари душу нашу, Чистая, и отжени всяку мглу сердца нашего. Даруй нам умиление, покаяние и сокрушение сердечное. Сподоби нас по вся дни живота нашего творити волю Сына Твоего и Бога нашего и во всем благоугождати Ему Единому. О Богомати, не престани молящи Рождшагося от Тебе за вся притекающия с верою к сему чудотворному образу Твоему и подавай им скорую помощь и утешение в скорбех и напастех и злостраданиях, избави их от клеветы и злобы человеческия, от враг видимых и невидимых и всякия нужды и печали. Спаси отечество наше, царствующий град наш, град сей и вся грады и страны от всяких бед и нужд, и сотвори милостива нам быти Бога нашего, отврати всякий гнев Его на ны движимый и избави ны от лежащаго и праведнаго Его прещения. О Боголюбивая Владычице, Ангелов украшение, мучеников слава и всех святых радости, с ними моли Господа, да сподобит нас в покаянии скончати живота нашего течение. В смерти же час, Пресвятая Дево, избави нас от власти бесовския, и осуждения, и ответа, и страшнаго испытания, и мытарств горьких и огня вечнаго, да сподобльшися славнаго Царствия Божия, величаем Тя, и славим воплощагося от Тебе Христа Бога нашего, Емуже слава со Отцем и Святым Духом, ныне и присно и во веки веков. Аминь.



Великое чудо даровано нам — Феодоровская икона Божией Матери. Это — главная святыня Костромской земли, покровительница нашего края. Накрепко впаяна она и в общероссийскую судьбу. Перед Феодоровской иконой молился когда-то, не расставаясь с нею, святой благоверный князь Александр Невский. Пред нею преклонял колена в трудную минуту святой князь Дмитрий Донской. Ею на переломе нашей истории благословлен был на царство юный Михаил Романов, и с той поры Феодоровская икона стала родовой святыней Дома Романовых.

С глубокой древности она прославлена многими чудотворениями, и даже многочисленные копии, списки с нее окзывались чудотворными.

И в наши дни получаем мы неоспоримые свидетельства благодати Божией, изливающейся чрез эту святую икону.

Само появление иконы в Костроме связано с чудом. Костромской князь Василий обнаружил ее на дереве у речки Запрудни на следующий день после праздника Успения Богородицы — 16 (29) августа. Чудный образ, однако, сошел в руки только духовенства, которое крестным ходом доставило его в соборный храм Феодора Стратилата. Отсюда и название иконы. Но еще за день до этого костромичи видели, как сам Феодор Стратилат, словно сошедший с фресок, пронес эту икону по городу.

Чудом уцелела она во время страшных пожаров. Чудом отогнала врагов от Костромы во время очередного татарского набега. Тогда, при князе Василии, во второй половине XIII века Кострома стала фактической столицей Руси. «Многи прияша исцеления в та времена, различными недуги и скорбьми одержимии», — читаем мы в древней повести.

Второй праздник в честь Феодоровской иконы связан со временем, когда благодаря ей Кострома во второй раз стала временной столицей. Было это в начале XVII века 14 марта — 27 по новому стилю, когда в Ипатьевской обители святой иконой благословили на царство Михаила Романова.

Каждый день возжигаются ныне лампы и свечи перед всероссийской святыней. Стараниями архиепископа Костромского и Галичского Александра возобновлен с 1990 года крестный ход по городу в день ее обретения 27 августа. Каждое воскресенье читается у Феодоровской иконы акафист, который вы держите сейчас в руках.